

**Анна Яковлевна Молий**

Коми Республикаса Юралысьлөн 2022 во моз тöлысь 5 лунся 89 №-а Индöдөн сетöма «Почёта гражданин» Коми Республикаса медвылыс почёт ним (кувсьöм бöрын).

Чужис 1909 вося урасьöм тöлысь 16 лунö Баку карын.

1933 воö помалис инженер-технолог специальность серти Азербайджанса индустриальной институт. 1940 воö А.Я. Молий локтис Чибью посёлокö, уджалис Ухткомбинатса производственной юкöнын инженерөн. 1942 воö Анна Яковлевна Молийöс индисны Ухтаса мусир переработайтан заводö директорөн да юралысь инженерөн.

Айму вöсна Ыджыд тыш пансигөн заводын уджыс мунис сьöкыда. «Кокни» мусирсö кутисны перйыны этшаджык, установкаяс тырвийö уджодöм вылö сырьёис эз тырмы. Анна Яковлевна вöли гөгөрвоö, мый фронтсö колö дугдывтöг могмодны ломтасөн, да шуис велöдчыны вöчны Ярегаса сьöкыд мусирысь мукöдтор. Та дырйи эз дугöдчывны вузалöм вылö прöдукция лэдзöмысь.

Война кадö А.Я. Молийлөн юрнуöдигөн заводыс быдмис-сöвмис да лэдзис выль прöдукция: мавтасьяс, солидол, мазут. Заводса лабораторияын ярегаса мусирысь вöчисны кынмытöм мавтасьяс, татшöмьясыс сэки эз на вöвлыны. Заводсаяс уджалисны öтсöгласөн да ыстисны Ленинградö плансыс унджык мусир да мукöд ломтас-мавтас тыра матö 30 эшелон. Уджалысьяслөн фронтлы отсасьöмысь 1944 воын Ухтаса мусир переработайтан заводлы сетисны СССР-са оборона комитетлысь Гöрд знамя. Анна Яковлевналы, кыдзи заводса директорлы, сетисны «Уджын бура петкöдчöмысь» да «Германияöс вермöмысь» медальяс. 1944 воын сылы сетисны Уджыввса Гöрд Знамя орден.

А.Я. Молий 40 во олис Ухтаын, на пиысь 25-сö директоралис Ухтаса мусир переработайтан заводын да 12-сö юрнуöдис ВНИИГАЗ-лөн Коми филиалын туялан лабораторияөн. Сылөн веськöдлöм улын дасьтöма 30-ысь унджык наука-туялан удж. А.Я. Молий ачыс да уджёртгьясыскöд öтлаын гижис 20-ысь унджык наука статья да публикация. Тайö уджьясын туялöма Тимано-Печорскöй провинцияса месторождениеясысь углеводородной сырьё переработайтан мытшöдьяссö, а сідзжö найöс сиöма кар сöвмöмлы.

1947 воын А.Я. Молийöс бöриймаöсь Коми АССР-лөн Медвылыс Сöветса депутатөн. 1947 восянь 1951 воöдз сийö вöли Коми АССР-лөн Медвылыс Сöветса Президиумын Веськöдлысьöс вежысьөн.

Коми Республикалы бур вылö уна во чöж зiля уджалöмысь Анна Яковлевна Молийлы сетисны уна сикас канму награда. Сылөн эмöсь «Коми АССР-са наукаын да техникаын нимöдана уджалысь», «Коми АССР-са мусир да биару промышленностьын нимöдана уджалысь», «Наукаын да культураын нимöдана уджалысь» нимьяс. Ухта кар социальной да экономика боксянь сöвмöдöмын ыджыд заслугаясысь сылы сетöма «Ухта карса почёта гражданин» ним.

А.Я. Молий кувсис 1979 вося косму тöлысь 12 лунö.